



徐公文集卷第十七

東海徐鉉

岐王墓誌銘

故平昌君孟氏墓銘

故昭容吉氏墓銘

唐故鍾氏太夫人太原縣君王氏墓銘

唐故太原府君夫人彭城劉氏墓銘

唐故隴西李氏夫人墓銘

唐故文水縣君王氏夫人墓銘



岐王墓誌銘

天地之靈氣發為賢人邦家之積慶鍾于公族其或
富老成之智促殤子之年感羣情者目出於天資垂
英聲者非由於事業是以蒼舒軫悼於魏祖表行日
哀夏王鍾愛於明皇錫名為一中興在運代有人傑
見於岐王矣王諱仲宣今上之第二子也文武儲慶
日月輸祥實太姒之子如魯栢之貴天質秀發神機
內融亦既免懷未遑就傳問安長樂視膳寢門承歡
爰於瑤齋極友弟於朱邸成人之量宛由生知三歲

受封為宣城郡公假大司馬之秩維城之望日以光
矣不幸^全疾甲子歲冬十月二日薨于閣內年四歲
主上痛幼敏之異極天慈之懷詔輟朝七日冊贈司
徒追封岐王既而感上聖之忘情遵先王之從儉節
哀簡禮以厚古風即以其月十有八日備鹵部鼓吹
葬于江寧府某縣某里之原有司謚曰懷獻禮也唯
王以襁褓之年蘊金玉之度異迹昭灼可得而言至
如禁中娛侍常在左右或異宮一日則思戀通宵翌
旦未明必親至御幄須奉顏色然後即安其孝也如

此上每罷朝稍晏莊色未迴王則儼然侍立不妄言
笑頹天顏悅懌則趨就膝下怡怡稚戲不失其儀中
官以上之鍾愛恐漸於驕故撫字之方威克於愛每
加教誨過於嚴厲而王凜然祇畏初不壞容退或見
上乃啼以自悔其勞也如此始二歲上親授以孝經
雜言雖未盡識其字而每至發端止句之處皆默記
不忘至于寢疾近數千言矣時聽奏樂必振袂擊節
咸中律度工人試中變其曲王輟止之曰非前曲也
雖周卽之顧何以加焉其惠也如此受封之日見於

內殿音詞宣朗容之閑習觀之者咸歎重焉其敏也
如此凡玩好之物意有欲者瞬目賞譽未嘗求索或
識其意持以與之必再三推却不肯卽受其毅也如
此上曰昔人謂王勣為神仙童子今此兒近是乎及
其薨也悼念之甚曰吾見佗人賢子弟猶惜之豈惟
父子之性乎中宮哀慟至于加疾自非英姿感動敢
能臻此哉議者以為列宿淪精高真降迹表瑞王室
今復還矣嗚呼凡我臣庶暨乎藩戚瞻飛蓋之何期
慨神理之難測寧盡美於稱讚庶騰芳於簡冊詞臣

奉詔謹勒貞石其銘曰

粵我仙源流光慶延公族之異惟王生焉禮詩仁孝
斯之謂賢夙習非學生知自天既與之智胡奪之年
瞻庭蘭刈顧掌珠捐益冬寒氣京兆新阡鼓吹簫簫
旌旒翩翩踈逸躅於稚齒悶藩房於夜泉已焉哉庶
彭殤之一夢豈沒世之無傳

嗚呼庭蘭伊何方春而零掌珠伊何在玩而傾珠沈
媚澤蘭墮芳馨人猶沮恨我若為情蕭蕭極野寂寂
重局與子長訣揮涕吞聲噫嘻哀哉

又銘一首

至尊所作上省庭蘭掌珠之句謂得此興之實遂廣
其意發為斯文親迂宸翰批于紙尾足以厚君親之
義行孝慈之風是用勒石永光泉戶謹記

故平昌郡益氏墓銘

太歲癸卯五月十有九日大行皇帝諸妃平昌郡君
歿于大內之別院享年四十有三嗚呼哀哉昔天保
未定大東啟其疆魯道有蕩三相紀其政實始益氏
代為強宗德厚流光之符祥發慶膺之効宜乎來裔

生此淑人曾祖某祖造父及皆以含道居貞遊世無
悶克家垂訓式永門風郡君麗窈窕之容秉肅雍之
德游依漢水氣兆河間乃膺八月之求入預良家之
選壁門受職彤管服勤恭順之心奉坤儀而得禮明
惠之智導宮教而無遺爰屬造邦遂崇封邑路寢之
後柔芳載揚既而千載上仙宮車晏駕號遺弓於萬
國感餘香於九御沈哀共極美疹獨縈不延幽窆之
期重惻上宮之念嗚呼哀哉即以其年六月日葬于
江寧縣安德鄉德信里之原禮也青鳥既吉覆斧斯

營永光烈女之風畫紀侘山之石詞臣奉詔謹勒銘
云

杳杳平野蕭蕭一丘原松積霽隴吹臨秋于嗟淑女
於此藏舟委貞質兮厚夜奉靈駕兮仙游惟惇史兮
未泯豈餘芳兮不休嗚呼哀哉

故昭容吉氏墓誌

天子建內官必先令德九嬪掌婦學以教六宮是故
壺則成風漢瀕流化者矣昭容吉氏麗瑤姬之質富
班女之文治絲枲以服勤宮功有序徽采盛而舉職

徐公集卷之五
五
祀禮無愆用能妙簡皇心光膺盛典頃錫粉田之賦
因開左輔之封嗣服之初日不暇給視月卿而命秩
近正朝恩閱逝水以成川俄悲異物春秋三十有三
保大三年秋七月二日薨于別宮皇帝悼之廢朝一
日遺奠之禮有加等焉即以其年月日葬于上元縣
龍城鄉之原禮也昭容諱某字某東海朐山人也曾
祖徵朗州龍陽縣令祖黨壽陽縣令父彥輝海州懷
仁縣令咸膺鄉里之選屈從州縣之勞有利物之能
不享其位垂積善之慶克茂其宗著籍金門移家戚

里昭映惇史不其美歟詞臣奉旨式揚懿德庶使高
深自改長延丹砌之恩金石無虧仰慰璧臺之念其

詞曰

吉甫作頌穆如清風儲慶炳靈寔生昭容史曰明智
詩云肅雍內職以理柔芳有融閔川宵奔燃膏曉滅
西陸移景涼風殺節虞殞流聲遣車成烈苔華不磨
蘭菊無絕

唐故鍾氏太夫人太原縣太君王氏墓銘
夫人太原祁人也因官徙籍遂居豫章自緱嶺肇基

晉陽錫壤光靈繁祉蔚為大宗圭組簪纓與世升降
聖歷中否我亦不彰故祖考某皆蘊道居貞流謙毓
德夫人有金玉之質桃李之姿柔順睦姻以奉慈訓
組紉織紵聿勵家風宗族里閭莫不稱羨先公司徒
績戎嗣服實臨我邦夫人誕昭四德之華用光九女
之選門內之理實皆聽之家人尚嚴婦道貴順主饋
以敬均養以慈契濶夷險始終若一邦君內則皆取
正焉嗚呼昊天不庸路寢即順夫人棘心蓬首率由
舊章素尚空玄益所明習常齋居晏處諷誦真文雖

祁寒盛夏未嘗廢也又以恭儉孝悌文學道義訓勵
子弟皆成其名保大_一年詔封太原縣太君從子貴
也二子長曰懷建由校書郎歷東府掾以羣從百口
家于豫章于是辭祿公朝歸綜司政因除洪州都督
府司馬次曰舊以屬詞敦行從事成藩累登臺郎為
集賢殿學士會中令齊王避親謗寵授鉞臨川朝廷
慎選英僚以光幕府除撫州觀察判官檢校屯田郎
中既拜而夫人疾亟交泰元年春二月十八日卒于
京師嘉瑞坊之官舍享年七十有五即以某年月日

歸葬于洪州某縣某里之原禮也嗚呼富壽哉穀天
所以祐善也金石銘誥世所以垂範也二者無愧可
謂賢哉鉉早奉世親晚連姻好景行懿德敢用直書
其銘曰

緱山不傾清淮不涇故我王氏實生令人衛姬之智
孟母之仁先昭祖禰垂慶來雲西山之陽章江之濱
靈仙攸宅松楸相因遐壽歸全以反吾真

唐故太原府君夫人彭城劉氏墓銘

夫人麗窈窕之容蘊幽閑之德孝敬肇于天性明惠

本於生知光乎六姻是謂賢女初我大父躬考遇皆
立功興運蔚為將臣婚姻之盛冠彼當代故夫人既
笄歸于我府君君諱承進壽州節度使相國公之第
三子也二族斯睦百兩是將婦禮之嚴家道爰正府
君性疎直喜賓客理劇如簡不以世務嬰心行已取
適不以家財為重鐘鼎之族化為簞瓢夫人雅性冥
符怡然自足慈和待物恭儉飾躬子弟以之而克家
僕御以之而服教及罹蓬首之痛擔全栢舟之節柔
芬方遠景命不融春秋四十有九戊午夏六月某日

終于京師濱江坊里第子某等俯就成制既奉靈輶
即以其年月日葬于某鄉村府君之塋禮也鉉幸參
諸婚獲從外姻載陳執紼之儀仍奉懷鈿之託敢書
懿範以鏤貞珉其詞曰

嗟淑女兮仁慈肅雍伊君子兮亮簡殊通合二姓兮
五侯之宗垂內則兮素士之風悲秋霜與冬霰摧女
蘿與青松念光塵之倏忽獨天長兮無窮

唐故隴西李氏夫人墓銘

夫人諱某字某其先太原人故左司郎中贈太府卿

諱潜之孫今太弟洗馬裔之第三女也伯仲世父皆
踐歷臺閣抑揚聲實相糾以孝相高以諱芝蘭桃李
閨庭粲然夫人襲圭組之英發為秀色鍾姻睦之氣
凝為淑性柔而有則愛而不驕糾組之工翰墨之妙
稟自天性能必過人及長歸于李君君名俛故楚州
刺史諱承嗣之孫今禮部尚書度之少子也舅甥之
故齊魯之匹好合之美潘揚之風夫人移天睦族率
由典禮不恃舊以廢職不矜能而怠斲門內之理清
芬穆然嗚呼嚴霜春零薜華朝墜享年二十有五某

年月日卒于京師某里之寓居二族悲慟六姻悽愴
仁而不壽古則有之以其年某月日葬于江寧縣某
鄉里之原禮也東海徐鉉以世親之舊實維私之勞
執紼永悼刊石為銘銘曰

天之命兮不可知生此賢女兮鍾淑姿孀于盛族兮
昭令儀與之才兮不與之壽永凋落兮芳時儼黼黻
道靈輻小江村兮長江湄千秋萬代兮草離離空餘
初月如蛾眉

唐故文水縣君王氏夫人墓銘

夫人諱晚字國香其先太原人今為廬江人也祖潛
左司郎中贈太府卿考坦禮部郎中皆以貞幹純懿
見稱於時夫人麗窈窕之容秉明慧之性幼失所恃
事繼親以孝聞在家不違於姆師移天不失於婦順
初先姑之治也嚴而有惠通而得禮夫人觀形稟教
莫不率循故三十餘年門風家法凜然如舊性尚靜
退不樂世喧始愚之在要職也夫人憂形於色及其
居貶所反欣然忘貧此其所以為異也雖門族素盛
而世塗多故祿賜所入調給無遺豐約同之親疎如

徐公集卷之五
一至於澣濯之儉組紉之勤繁藻畫劬儒玄勵操環
珮中節始終不渝少善秦聲長亦捨棄每晨興誦五
千言而已享年五十戊辰歲八月一日終於京師舜
澤里之官舍其年十月二十三日歸窆于西山洪崖
鄉鷲岡里從先姑大塋禮也有子曰夷直女曰神華
林華嗚呼愚常以體道委命為懷而情之所鍾不知
其慟銜涕秉筆庶不泯其聲塵焉銘曰

緱嶺之靈生此淑人洪崖之濱寄此新墳生與道俱
沒與仙隣悠悠精爽豈或為塵嗚呼吾信積善之必

爾故攄恨於斯文

徐公文集卷第十又

徐公文集卷第十八

東海徐鉉



御製春雪詩序 後序

御製雜說序 北苑侍宴詩序

文獻太子詩集序 翰林學士江簡公集序

蕭庶子詩序 成氏詩集序

御製春雪詩序

臣聞堯尚文思書有詠言之目漢宗儒學史稱好道之名所以澤及四海化成天下其後迂濶王道蕩搖

淳風正始之音闕而莫續魏帝浮雲之句不接興詞
王融曲水之篇無聞聖作將興古義允屬昌期我皇
帝陛下常武功成右文業廣明踰日月不以聖智自
居思拔雲天不以才能格物其或南薰有懌東作無
憂民思秋稼之娛物茂冬蒸之禮思覃在錫調振橫
汾天籟發音疇非聳聽乾文垂象寧隅仰瞻信可以
暢列聖之謨猷變生人之耳目者也於是歲躔作噩
序首青陽玄鳥司啓之明晨白獸稱觴之節日有唐
中興之一紀皇上御曆之七年地平天成時和歲稔

衢樽之味普洽玄風擊壤之聲散為和氣同雲音野
朔雪飛空急勢隨風影亂東郊之仗凝華接曙光浮
元會之筵星躔既移雲壘乃啓太弟以龍樓之盛入
奉垂旒齊王以鳳沼之崇來參變几雲軒結轍革履
齊趨唯陳韶護之音無取魚龍之戲喜油油之既洽
顧奕奕之方呈筆落天波言成帝典七言四韻宣示
羣臣乃命太弟太傅建勳翰林學士給事中朱軾常
夢錫翰林學士中書舍人殷宗義游簡言吏部尚書
毗陵郡公景運工部尚書上饒郡公景遜左常侍勤

政殿學士張義方諫議大夫勤政殿學士潘處常魏
本駕部員外郎知制誥喬舜主客員外郎知制誥徐
鉉膳部員外郎知制誥張緯光祿卿臨汝郡公景遼
鴻臚卿文安郡公景遊太府少卿陳留郡公景道左
衛將軍樂安郡公弘茂駕部郎中李瞻等或賡元首
之歌或和陽春之曲如葵心之傾日馭似蟄戶之向
當門二十一篇咸從奏御皆所以美豐年之兆申萬
物之情非徒載笑載言一吟一詠而已昔者白雲之
唱七萃驅馳黃竹之詩萬人凍餒王猷且塞後嗣何

觀孰若偃仰大庭優游六藝初筵有秩而六宮不務
夜漏未央而百官已事被之樂府授以史官煥乎文
章無得而稱也有詔為序以紀歲月御批云宿來健
否酒醒詩畢可
有餘力何妨一為之
序以紀歲月呵呵天慈過聽猥屬微臣徐樂上書
徒慙暮入其日內宴臣
鉉迨夜方赴安國作序幸冠首篇狂簡僅
成兢憂罔措謹上

後序

昔者漢宮故事著成王負宸之圖魯殿宏規紀黃帝
垂衣之象用能昭文服物雖十世而可知如玉如金

更百玉而不易况乎天統建寅之首皇猷累洽之晨
上瑞方呈宸游載穆拱北極而衆星咸在祝南山而
萬壽無踰明皇花萼之樓風流不泯德祖中和之節
雅頌常垂寶奕世之耿光為中朝之盛觀固當騰之
竹帛飾以丹青襲六藝以同明與天文而共麗皇太
弟重离普照博望凝思敦古道以致君法前經而作
事命千秋而指畫召立本以趨馳象然後素之功焯
爾彰施之象煦如就日肅不違顏萬國式瞻若奉衣
裳之會羣臣仰止似聞輿馬之音盛德形容於斯大

備者也初外朝既罷內宴方陳赴召者上自副君逮
于戚里銅壺已晏聖藻爰飛或逡巡而載歌或踟詠
而不作既而有詔出示羣官臣建勳義方鉉等聞命
在前援簡先就因承中旨入奉斯筵而兩省衆篇翌
日咸集故奉和者二十一首而侍宴者十有四人前
序闕遺被令重述謹上

御製雜說序

臣聞軒后之神也畏愛止乎三百唐堯之聖也倦勤
及乎耄期文王之明夷也爰象周於六虛宣父之感

麟也褒貶流於百代乃知功利之及物者與形器而有限道德之垂憲者將造化而常新是故體仁者必懇懇於立言務遠者必勤勤於弘道然則封泰山告成功七十二家正禮樂刪詩書一人而已大矣哉立教之難也有唐基命長發祥符舊物重甄斯文不墜皇上高明博厚濬哲文思既承累聖之資仍就甘盤之學鴻才綺縟理絕名言默識泉深事符影響自祇膺眷命欽若重熙廣大孝以厚時風勵惟精而勤庶政宥萬方而罪已體百姓以為心俗富刑清時安歲

稔其或萬機暇豫禁藥宴居接對侍臣宵分乃罷討論墳典昧旦而興口無擇言手不釋卷嘗從容謂近臣曰卿輩從公之暇莫若為學為文為學為文莫若討論六籍游先王之道義不成不失為古儒也今之為學所宗者小說所尚者刀筆故發言奮藻則在古人之下風以是故也其高識遠量又如此焉昔魏武帝有言老而勤學而所著止於兵書吳大帝亦云學問自益而無聞述作風化之旨彼其惡歟屬者國步中艱兵鋒始戢惜民力而屈已畏天命而側身靜慮

疑神和光戢耀而或深惟遂古遐考萬殊懼時運之
難并鑑謨猷之可久於是屬思天人之際游心今古
之間觸緒研幾因文見意縱橫毫翰炳耀縑緗以為
百王之季六樂道喪移風易俗之用蕩而無止怕心
埋耳之聲流而不反故演樂記焉堯舜既往魏晉已
還授受非公爭奪萌起故論享國延促焉三正不修
法弊無救甘心於季世之偽絕意於還淳之理故論
古今淳薄焉戰國之後右武戲儒以狙詐為智能以
狂藝為迂濶此風不革世雖未已故論儒術焉父子

恭愛之情君臣去就之分則褒申生明荀彧俾死生
大義皎然明白推是而往一無弗臻皆天地之深心
聖賢之密意禮樂之極致教化之本源六籍之微辭
羣疑之互見莫不近如指掌煥若發蒙萬物之動不
能逃其刑百王之變不能異其趣洋洋乎大人之謨
訓也夫天工不能獨運元后不能獨理故有道無時
孟子所以咨嗟有君無臣鄭公所以歎恨庶乎斯民
有幸大道將行舉而錯之域中則三五之功何遠乎
爾臣又聞將順致美鋪陳耿光布堯言於萬邦稱漢

德於殊俗蓋詞臣之職也若乃嚮明而理負宸而朝
慶賞威刑豫游言動則有太史氏存焉又若雅頌文
賦凡三十卷鴻筆麗藻玉振金相則有中書舍人集
賢殿學士徐鍇所撰御集序詳矣今立言之作未即
宣行理冠皇墳謙稱雜說臣鉉以密侍禁掖首獲觀
瞻有詔冠篇勒成三卷而三卷之中文義既廣又分
上下焉凡一百篇要道備矣將五千而並久與二曜
以同明昭示孫謨永光冊府謹上

北苑侍宴詩序

臣聞通物情而順時令者帝王之能事感惠澤而發
頌聲者臣子之自然况乎上國春歸華林雨霽宸游
載穆聖藻先飛雷動風行君唱臣和故可告於太史
播在薰絃帝曲皇墳莫不由斯者已歲墜已巳月屬
仲春主上御龍舟游北苑新王舊相至於近臣並儼
華纓同叅曲宴斯時也風晴景淑物茂人和望蔭
馮之嶽崧祝為聖壽汎潮潏之清淺流作天波絲篁
與擊壤齊聲酸率與君恩共醉乃命即席分題賦詩
睿思雲飄天詞綺縵文明所感頌詠皆同既擊鉢以

爭先亦分題而較勝長景未暮百篇已成自揚大雅
之風豈在道人之職奉詔作序冠于首篇授以集書
藏之金匱謹上

文獻太子詩集序

鼓天下之動者在乎風通天下之情若存乎言形於
風可以言者其惟詩乎粵若書契肇生雅頌乃作達
朝廷邦國之際其用不窮更治亂興替之時其流不
竭六義浸遠百代可知若夫王公大人居尊履正其
行道也無迹其成務也不宰所以可則可象有功有

親非夫詠言何以觀德周文陳王業之什召穆糾宗
族之篇聖人輯之皇猷備矣子相振建安之藻昭明
摠衆作之英體有古今理無用捨夫機神肇於天性
感發由於自然被之管絃故音韻不可不知形於蹈
厲故章句不可不節取譬小而其指大故禽魚草木
無所遺連類近而及物遠故容貌俯仰無所隱怨則
可戒贊美不誣斯實仁者之愛人智士之博物王室
光啓人文化成上去刪詩綿二千祀其用益廣其制
益精絕其流冗結以周密王言帝典炳蔚於鱣緇詞

後集卷八
人才子充溢於圖謀若乃簡練調暢則高視前古神
氣溥薄則存乎其人亦何必以苦調為高竒以背俗
為雅正者也殿下挺生知之哲有累聖之資道冠三
才學兼百氏虞庠齒胄騰聲於就傳之年侯社錫圭
底績於為邦之際隨城封壤人歌召伯之棠浙右控
臨時賴京師之潤戎機鞅掌曾不勞神閑館娛游未
嘗釋卷深遠莫闕其際喜愠不見於容唯奮藻而摘
華則緣情而致意至鍾山樓月登臨牽望闕之懷北
固江春眺聽極朝宗之思賞物華而頌王澤覽禘事

而勸農功樂清夜而宴嘉賓感邊塵而閑行役沈吟
命筆顧眄成章理必造於玄微詞必關於教化或寓
言而取適終持正於攸歸著於簡編凡若干首及玉
符來覲玄圃歸尊臨飛閣之華池即游雷之講肆斯
文間作盛德日新蓋曠代之宗英實一時之師匠以
鉉幸塵贊論嘗曲絲綸謂可言詩因令視草聽鈞天
之奏徒欲動心酌滄海之波唯知滿腹勞抽短翰式
繼頌聲謹序

翰林學士江簡公集序

徐公集卷之八
士君子藏菟於身應物如響成天下之務者存乎事
業通萬物之情者在乎文辭然則日月不知人亡政
息瞻之則渺然在義軒之上蹈之則肅然若旦暮之
間自非遺文餘教則作者之道或幾乎息矣嗟夫天
地長久英靈超忽鄴中才子與樂事以俱淪江左名
臣及玄譚而共盡清流可揖勝氣猶生閱蠹簡以淒
涼撫絕韋而慷慨斯文未喪何代無人濟陽江公鍾
川嶽之粹靈體角犀之竒相芳蘭十步本自天資建
木千尋非求外獎弱齡聞道夙歲知名竹箭稱美於

東南來充王府天馬擅竒于西北入奉乘黃于時聖
曆中興賢才間出公從容冠蓋之際頡頏臺閣之間
文高學深職優理勝虛襟接物簡易多通正色當官
直方無擾定祖宗之大號功補神明端風憲之直繩
氣攝姦宄身可屈而名不辱用即行而捨即藏故叢
棘三年雅懷自若承明再入時望彌高人無間然道
亦光矣嗚呼運逢上聖年在中身人之云亡空嗟殄
瘁死而可作誰與同歸詩所謂胡不萬年傳有云古
之遺愛者也昔襄陽孟浩然年五十有二疾發背而

亡公豈其後身歟何符合之若此惟公以進士擢第以詞賦馳名事藩邸忝管記之司登朝籍專掌綸之任奏議表啓時然後言詩筆歌頌和者彌寡絕文場而遠鶩橫學海以孤飛綜南北之清規盡古今之變體優游兩制不亦宜乎然而初無簡編文乃亡逸嗣子翹門生王克貞等或搜諸經笥或傳於人口或焚藁之外或削材之餘彙聚羣分凡得十卷授之執友以命冠篇鉉族近情親官聯迹密每西垣景晏北第風清忘形樽俎之間得意筌蹄之表西江東海俱為

賦鵬之鄉北門右掖並對受釐之問嗟乎相如既往空存封禪之書季子云來但有心期之劔寢門流慟已隔生平都門長送遽成今昔追託言於夙契申永於斯文援毫悲吒存諸梗槩云耳

蕭庶子詩序

人之所以靈者情也情之所以通者言也其或情之深思之遠鬱積乎中不可以言盡者則發為詩詩之貴於時久矣雖復觀風之政闕道人之職廢文質異體正變殊塗然而精誠中感靡由於外獎英華挺發

必自於天成以此觀其人察其俗思過半矣此夫澤
宮選士入國知教其最親切者也是以君子尚之蘭
陵蕭君江左之英詩苑之精其為人也樂易其處世
也靜默忘形衡泌之下苦節戎馬之間其道日新其
名益震諸侯虛左五府交辟今晉王殿下樹藩作相
樂善愛才幕府初開君實首冠由典檢書至儀曹即
出入兩宮官無虛授優游多士交必正人每良辰美
景登高送遠適莫不存於心府勢利不及於笑談含
毫授簡唱予和汝其性淡故略滛靡之態其思深故

多清苦之詞大雅之士何以過此鉉與君為友幾將
二紀其間聚散窮達罕或寧居淡成之懷終始若一
靜言投分想見古人丁巳歲撫王高謬承華出分陝
服君以宮省舊德復踐初筵撰行之夕俾予視草鉉
也不佞無足場君之美徒欲申別恨叙交情故作斯
文冠于篇首云爾

成氏詩集序

詩之旨遠矣詩之用大矣先王所以通政教察風俗
故有采詩之官陳詩之職物情上達王澤下流及斯

道之不行也猶足以吟詠情性黼藻其身非苟而已矣
若夫嘉言麗句音韻天成非徒積學所能蓋有神助者也
羅君章謝康樂江文通丘希範皆有影響發於夢寐今上
谷成君亦有之不然者何其朝捨鷹犬夕味風雅雖世儒
積年之勤曾不能及其門者邪逮余之知己盈百篇矣觀
其詩如所聞接其人如其詩既賞其能又責其異故為
冠篇之作以示好事者云戊戌歲正月日序

徐公文集卷第十八

徐公文集卷第十九

東海徐鉉



送謝仲宣負外使北蕃序

送贊善大夫陳翊致仕還鄉詩序

送張似郭貴二先輩序

送武進龔明府之官序

送劉生序

游衛氏林亭序

送謝仲宣負外使北蕃序

自昔新都盜國撓我中州建武開元越在江左日月
之照不及河洛之地者四十年矣主上方恢遠略弘
下武聖作物覩有開必先故使偽邦失政胡馬大入
山泉反覆羌渾沸騰五州遺眈二京故老引領南望
庶幾撫予天子聞之憫然故命大司馬賈公使以觀
變儀曹即謝君副焉儀曹別予應曰美哉是行蒼生
之福在斯舉矣始予及子同省予弟又與子同府交
道深矣今子將之絕域無以為贈請贈以言夫格天
地充四方莫先乎禮昔我太宗文皇帝革暴隋一寓

內屈已濟物虚心幼諫故四夷君長歷代不賓稽顙
闕下可謂德矣聲明文物垂三百年絕而復續可謂
禮矣苟使踰百千代之有國家者猶當企聳下風奉
行不墜况中興之嗣君乎周秦宮闕是本朝二宅貞
觀德是本朝家法若棄之而不念委之而不修非天
子之意也主上躬行於內而使二君順之於外今強
胡入貢中原無主聖人不能違時時至不可失也子
其勉之哉思聖意顧人心犬羊百萬以攻戰為事不
可以威武服也酋豪聚首以姦詐為常不可以智力

勝也子其將之以德慎之以禮衣冠餘緒必觀光於
使臣一覩漢官威儀必感泣頓服宅心南向苟或不
爾是絕蒼生之望也可不慎歟鉉自束髮從官則聞
長者之論盛言為戰國者必以權道子視商周以降
誰非戰國寧有以權道躋太平乎而言以人棄故事
與願違今子王府元僚居可言之地遠使上介當可
行之時勉之哉故人之願蒼生之望在此而已行矣
文昌春風二月征塗萬里捨游宴之適就鞍馬之勞
征虜亭下南朝送別之場臨滄觀側茂弘思洛之所

叙離懷古寧無情乎矧軺車所經觸緒牽思渡長淮
則想清流映月之景過睢園則思愁雲零雪之興望
輦洛則傷麥秀之詩指唐晉則感大風之歌緜懷之
暇彈琴詠詩以祛鬱陶之慮還軫在邇不復多陳聊
序鄙志爾

送贊善大夫陳翊致仕還鄉詩序

夫進退之機大易稱首止足之誠立丈所宗君子動
必乘時故言行而事立靜惟體道故身貴而名全然
則知之非艱行之不易去聖既遠引年益稀是以古

徐集卷九
之明君爰有成式重辭祿之士優懸車之禮賁飾寵
秩靡限常均所以崇德尚賢激貪勵俗者也皇風所
及我有其人太子洗馬陳翊江浙炳靈鄉閭獲譽棲
遲下位而升聞自高便蕃寵任而祇畏日積時方多
難寄切司聰將命無私臨事能斷盤錯必解風雨不
渝及少海告符搖山表慶天下之本既正四郊之壘
亦罷於是詠遂初之賦決高謝之懷京口之西先有
別墅前臨廣陌却枕長江田逾二頃桑都八百戴仲
若軒懸之地不遠風煙蒲真人鹿迹之鄉依然川域

誅茅築室素欲終焉其所闕者飛泉而已嘗因暇日
策杖尋幽爰有道人指示崑溜百步之內一道懸流
其清可鑑其味如醴縈崖漱石滌慮蠲疴信山川助
其好尚亦心府資其瑩濯既而挂冠請命伏閣陳詞
優詔嘉之竟允其請錫金紫之服升贊善之資輕舟
東浮盡室而去副君執手流涕似宜都之別弘景羣
公供帳祖餞若都門之送二疎知與不知莫不稱歎
殿下調高雅頌文動星辰賦詩一章以寵行邁掩鄴
中之舊制流樂府之新聲足以厚君臣之情敦風化

之本鱣鮪麗色丘壑增華自周行人與觀光之士
靡然投贈粲爾成章遠比河梁之篇近擬白雲之集
夫其貞退之節樂善之風實教義之所臻亦詠歌之
盛觀也鉉名叅望苑迹本騷人敢言能賦之才濫奉
言詩之賜勸序麗則冠于首篇

送張似郭賁二先輩序

君子所以章灼當時焜耀來裔者必曰進士擢第畿
尉釋褐斯道也中朝令法雖百王不移者也自聖曆
中興百度漸貞能興此美者今始見張郭二生矣則

知九仞之勢千里之行凝雲逐日未可量也鉉也不
佞生於先賢之後進在二子之前此美不兼可以歎
息然有事同而時異請試論之噫詞場墮廢五十年
矣故老之言議殆絕後生之視聽懵然今百辟有司
達于郡國吏徒見趨走公府中一尉耳焉知其餘哉
而二君子調高才逸年少氣盛將以俊造之業自重
責人以既廢之禮又將以堯舜之道為用議政於俗
吏之間如是將與時大乖矣嗚呼彼衆我寡或者難
以勝乎君子之道無施不可舒之彌四海卷之在掌

握日殫見竒於牧馬元楊知名於水磴彼二人即公
輔大器也豈以恥辱為累哉愚願二君子反已正身
開懷載擢無望人以不知無強人以不能如斯而已
矣今天子重文好古諸生懷才待用所以蒼生未蒙
福者上下之勢殊中有間爾大易之義物不終否否
極必泰泰之時在上者其道下降在下者其道上行
君臣相合然後事業遠矣吾以為斯道之復不遠吾
子其勉之句曲仙鄉廣陵勝地多難將弭春物將華
琴棊詩酒足以為適贈言之旨盡於斯焉

送武進龔明府之官序

古人有言士君子志意既立名譽不聞蓋朋友之過
也嗚呼予於龔生有之矣始予居獻納之地生已為
赤縣尉嘗竊議謂生宜叅諫垣憲府之任而未果拔
茅之志遽為賦鵬之行生不旋踵亦左授天長用武
之地朝廷置建武軍於其所使為將者治之習兵與
儒其志不通也處長與佐其勢不均也軍市之征日
困於民王澤之流不被於俗及生之至官聯始舉刪
頌革弊丕變舊風踰年告歸舉邑之民相率遮道不

聽去乃潛匿佛廟室中者羣輩索而獲焉扶之上車
擁之而還竟不得已中夜而遁異哉遺愛之風若此
考功之吏弗聞丙辰歲予避兵于池陽遇生侍親郡
中勉之東下是時甘泉有烽火之急天子下哀痛之
詔予謂生必自致青雲之上以解天下之倒懸而出
入三年始為武進宰噫非朋友之過乎嘗試論之曰
才不才在我用不用在時道之所存其人乃貴功名
寵祿何足算哉苟澤及於民教被於物則百里之廣
千室之富斯可矣與夫楊孟之徒坎軻問巷垂空言

於後世者不猶愈乎行矣龔生苟有良田何憂晚歲
贈言之要其過此乎

送劉生序

彭城劉生為南畿令天官侍郎昌黎公作序以送盛
稱故歷陽宰楊負外光儒之為政以最之鉉與楊君
有姻深知其內行君清簡仁愛心無適莫自妻子僕
妾及家族吏民接之無親疎之隔求之於形骸之外
蓋真純之氣充而感召之應遠民之好競者皆相與
言曰象若器必撓吾負外矣嗚呼其古人乎今劉

生才俊於楊學優於楊觀其政績等然生猶有耿介
不平之氣觀吏部之昂子與予之贈言蓋為是也子
其平心藏用溜然與道合在古人上矣矧西山神仙
之宅也旌陽其遠乎僕固倦談生停驂已久故揚摧
以論之九月二十七日中書舍人徐鉉序

游衛氏林亭序

建康西北十里所有迎擔湖水木清華魚鳥翔泳昔
晉元南渡壺漿交迓於斯今中興建都人烟擲比於
是其間百畝之地宮率衛君澣水之所也前有方塘

曲沼之勝後有鮮原峻嶺之奇表以虛堂累榭飾以
怪石珍木悅目之賞充物其中待賓之具無求於外
庶子王君諭德蕭君贊善孫君與上臺僚嘗游焉賢
衛君也陶陶益夏杲杲初日虛幌始闢清風颯然班
荆蔭松琴奕詩酒登降靡也闕臨駘蕩熙熙然不知
世之與我之為異矣嗟夫天生萬物貴適其性君子
有屈身以利物後已而先人或行道以致時交或効
智以濟世用斯有貴乎自適者也朝市丘壑君得中
道焉下雍道汙智劣無益於事山資弗給歸計未從

每尋幽選勝何遠不屆一踐茲境杳然忘歸凡我同
游皆為智者徵文紀事其有意乎壬子歲夏五月祠
部郎中知制誥徐鉉躋蹠嘒嘆之所作也

徐公文集卷第十九

